




ՍԱՐԿԱՎԱԳՆԵՐԻ ԶԵՌՆԱԴՐՈՒԹՅՈՒՆ

Մայիսի 14-ին՝ կիրակի օրը, հոգեգալստյան տոնին, Մայր տաճարում կատարվեց հոգևոր ճեմարանի երկրորդ լսարանի շորս ուսանողների սարկավագական ձեռնադրությունը:

Մայիսի 13-ին՝ շաբաթ օրը, երեկոյան ժամերգությունից հետո, կատարվել էր նորընծաների կիսասարկավագական աստիճանի տվությունը:

Հոգեգալստյան տոնի առիթով Մայր տաճարում հանդիսավոր ս. պատարագ մատուցեց լուսարարապետ գեր. տ. Հայկազուն արքեպ. Աբրահամյանը և կատարեց սարկավագական շնորհաբաշխությունը:

Խարտավիլակի պաշտոնը կատարում էր հոգևոր ճեմարանի տեսուչ հոգ. տ. Ներսես Ժ. վրդ. Պողպատյանը:

Ս. պատարագին ու ձեռնադրության խորհրդին ներկա էր Վեհափառ Հայրապետը:

Հոգեգալստյան տոնը հոգևոր ուրախության կրկնակի բերկրանք էր պատճառել հոգևոր ճեմարանի տեսչությանը և Մայր Աթոռի միաբանությանը:

Օրվա տոնի նշանակության և ձեռնադրության հուշիչ, սրտագրավ խորհուրդը համակել էր բոլորին:

Ձեռնադրության սրբազան պահին բոլորը հուզումով հիշում էին այն օրը, երբ այսօրվա նորընծաները, անկազմակերպ մտքով ու հոգով, երկյուղածությամբ ու վարանումով բախում էին ճեմարանի դռները, իսկ այսօր, իրենց ազատ կամքով, համարձակորեն առնում էին առաջին, վստահ, գիտակից քայլը՝

հոգեպես, իմացապես աճած, ֆիզիկապես մեծացած, և ծնրադրում՝ իջման ս. սեղանի առաջ և ուխտում՝ աննահանջ սիրով և բոլորանվեր ոգով ծառայելու Մայր Աթոռ ս. էջմիածնին, հայ եկեղեցուն և հայ ժողովրդին: Ուրախ էին բոլորը:

Ուրախ էր ամենից առաջ Հայոց Հայրապետը, որպես նորընծաների Հայրն ու նրանմակալը, որ միշտ հայրական գործով և ուշադրությամբ էր շրջապատել իր հոգևոր պալաններին, միաբանությունը, որ իր գիրկն էր ընդունում խոստումնալից նոր եղբայրների, ճեմարանի տեսչության ու դասախոսական կազմը, որոնք արդար հունձք էին ներկայացնում Աստծուն և ազգին, և վերջապես ուրախ էին նաև նորընծաները, որ ոտք էին դնում իրենց երիտասարդ հոգիների ամբողջ նվիրումով և խանդավառությամբ եկեղեցու և ժողովրդի ծառայության առաջին աստիճանի վրա:

Արդարև, միշտ հնչել է Մայր Աթոռի կամարների ներքո «աստուածային և երկնային շնորհ»-ը, որ «միշտ լնու զպէտս սրբոյ սպանաւորութեան առաքելական եկեղեցոյ», որովհետև երբեք չի պակասել Մայր Աթոռի միաբանության մեջ ծառայության և նվիրման ոգին:

Հանդիսավոր ս. պատարագը շարունակվում է մինչև «ողջոյն»:

Ձեռնադրիչ սրբազանը աստիճանավոր շնորհում է սարկավագական իշխանությունը խորհրդանշող սրբությունները՝ «ա՛ռ դմաբուր և սուրբ ուրարս ի ձեռաց Տեառն մերոյ

Յիսուսի Քրիստոսի... Կենք քո և վարք քո
լինցին օրինակ ժողովրդեանս»:

«Ա՛ռ իշխանութիւն ընթեռնուլ զսուրբ Աւետարանս յեկեղեցիս Աստուծոյ՝ յունկն կենդանեաց և յիշատակ մեռելոց»:

Հավատացյալները լուռ ու խոհուն հետևելով են խորհրդի կատարմանը:

Սրբազանը արարողության ավարտին խոսում է բովանդակալից մի խրատական՝ նորընծաներին ուղղվալ, որ նրանք զինված ս. Ստեփաննոսի հավատքով ու ոգով, լինեն իրենց քարոզչական, առաքելական ծառայության դաշտում «մշակք առանց ամօթոյ»:

Հավարտ ս. պատարագի չորս սարկավագները տ. Հայկազուն արքեպիսկոպոսի և տ. Ներսես Ժ. վարդապետի առաջնորդությամբ բարձրանում են վեհարան, իրենց Հոգևոր Հոր՝ Հայոց Հայրապետի օրհնությունը ստանալու:

Մայիսի 15-ին՝ երկուշաբթի օրը, ճեմարանի սեղանատանը, ի պատիվ սարկավագների, տրվում է ճաշկերույթ, որին մասնակցում է նաև ճեմարանի դասախոսական կազմը:

Նորընծա սարկավագներին առաջինը շնորհավորում է տեսուչ տ. Ներսես Ժ. վարդապետը:

Հանուն Մայր Աթոռի միաբանության խրատական է խոսում տ. Հայկազուն արքեպիսկոպոսը:

Սարկավագներին ուղղվալ շնորհավորության սրտագին խոսքեր են ասում դասախոսներ Ա. Հատիտյանը, Գր. Գյուլյանը, Ս. Անթոնյանը, ճեմարանի վերակացու Ս. Հովհաննիսյանը:

Ընդունելության վերջում, նորընծա սարկավագների անունից շնորհակալության ք. հ. րախտագիտության սրտագին խոսք է ասում բարեշնորհ Աբգար սրկ. Մարտիրոսյանը:

Սեղանը փակվում է խմբավին երգված տեղումական աղոթքով:

Սարկավագության կողման արժանացած ուսանողներն են՝

Բարեշնորհ Սասուն Սարկավագ Վարդանյանը, ծնվել է Հրազդանի շրջանի Սուլակ գյուղում՝ 1942 թվականին: Ավարտել է միջնակարգ դպրոցը և 1966 թվականի փետրվարին ընդունվել Հոգևոր ճեմարան:

Բարեշնորհ Հովսեփ սարկավագ Հակոբյանը, ծնվել է էջմիածնում՝ 1950 թվականին, ճեմարան է ընդունվել 1962 թվականին:

Բարեշնորհ Արգառ սարկավագ Մարտիրոսյանը, ծնվել է Սեբաստիայում (Թուրքիա)՝ 1946 թվականին: 1965 թվականին ընդունվել է Հոգևոր ճեմարան:

Բարեշնորհ Վրեժ սարկավագ Ներսիսյանը, ծնվել է Թեհրանում՝ 1948 թվականին: 1965 թվականին ընդունվել է Հոգևոր ճեմարան:

